

佛說乳光佛經

西晉三藏法師竺法護譯

聞如是一時佛遊維耶離梵志摩調音樂樹下與八百比丘眾千菩薩俱國王大臣人民及諸天龍鬼神共會說經時佛世尊適小中風當得牛乳爾時維耶離國有梵志名摩耶利為五萬弟子作師復為國王大臣人民所敬遇豪富貪嫉不信佛法不喜布施但好異道常持羅網覆蓋屋上及其中庭欲令飛鳥不侵家中穀食之故所居處去音樂園不近不遠於是佛告賢者阿難持如來名往到梵志摩耶利家從其求索牛乳種來阿難受教著衣持鉢到其門下梵志摩耶利適與五百上足弟子欲行入宮與王相見時即出舍值遇阿難因問言汝朝來何其早欲何所求阿

難答曰佛世尊身小不安隱使我晨來索牛乳種梵志摩耶利默然不報自思惟我若不持乳種與阿難者諸人便當謂我慳惜適持乳與諸餘梵志便復謂我事瞿曇道進退惟宜雖爾續當指授與弊惡牛自令阿難擊取其乳又是瞿曇喜與我等共諍功德常欲得其勝當便是弊惡犍牛舐殺其弟子即可折辱其道便見捐棄我可還為眾人所敬阿難得乳若不得乳趣使諸人明我不惜為牛所殺不能得乳我意已達於我無過梵志摩耶利時謀議是事已即告阿難牛朝已放在彼壑裏汝自往擊取其乳種摩耶利勅其兒使言汝將阿難示此牛處慎莫為擊取牛乳種試知阿難能得乳不時五百弟子聞師說是悉大歡喜即復共疑怪阿難向者所說事則

相謂言寂志瞿曇常自稱譽我於天上天下最尊悉度十方老病死佛何因緣自身復病也五百梵志共說此已爾時維摩詰來欲至佛所道徑當過摩耶利梵志門前因見阿難即謂言何爲晨朝持鉢住此欲何求索阿難答言如來身小中風當須牛乳故使我來到是間維摩詰則告阿難莫作是語如來至真等正覺身若如金剛衆惡悉已斷但有諸善功德共會當有何病默然行得勿効外道誹謗如來慎莫復語無使諸天龍神得聞是聲十方菩薩阿羅漢皆得聞此言轉輪聖王法輪在前用無數德故尚得自在何況從無央數劫布施於一切人如來至真等正覺無量福合會成如來身阿難莫復使外道異學梵志得聞是不順之言何況世尊身自有病不

能療愈何能救諸老病死者如來至真等正覺是法身非是未脫之身佛爲天上天下最尊無有病佛病已盡滅如來身者有無數功德衆惡悉已除其病有因緣不徒爾也阿難勿爲羞慚索種疾行慎莫多言阿難聞此大自慚懼聞空中有聲言是阿難如長者維摩詰所言但爲如來至真等正覺出於世間在於五濁弊惡之世故以是緣示現度脫一切十方貪婬瞋恚愚癡之行故時往取乳向者維摩詰雖有是語莫復羞慚阿難爾時大白驚怪謂爲妄聽第十即還思惟言得無是如來威神感動所爲也於是五百梵志聞空中聲所說如是即無狐疑心皆踊躍悉發無上正真道意爾持梵志摩耶利內外親屬及聚邑中合數千人皆隨阿難往觀牛阿難到即住牛

傍自念言今我所事師作寂志者法不得手
 自擊取牛種也語適竟第二忉利天帝座即
 為動便從天來下化作年少梵志被服因住
 牛傍阿難見之心用歡喜謂言年少梵志請
 取牛種即答阿難我非梵志是第二忉利天
 帝釋也我聞如來欲得牛種故捨處所來到
 此間欲立本德故阿難言天帝位尊何能近
 此腥穢之牛帝釋答曰雖我之豪何如如來
 尊尚不厭倦建立功德何況小天我處無常
 皆當過去今不立德食福將盡後無所怙阿
 難報釋設欲為我取牛乳者惟願用時釋應
 曰諾尋即持器前至牛所時牛靜住不敢復
 動其共觀者皆驚怪之年少梵志有何等急
 來為瞿曇弟子而取牛種若儻為是弊惡牛
 所舐蹋死奈何不自全為寂志前取牛種帝

釋爾時即為阿難擊取牛種而說偈言
 今佛小中風 汝與我乳種 令佛服之差
 得福無有量 佛尊天人師 常慈心憂念
 蚘飛蠕動類 皆欲令度脫
 爾時犢母即為天帝釋而說偈言
 此手捫摸我 何一快乃爾 取我兩乳種
 置於後餘者 當持遺我子 朝來未得飲
 雖知有福多 作意當平等
 爾時犢子即為天帝釋而說偈言
 我從無數劫 今得聞佛聲 即言持我分
 盡用奉上佛 第十 世尊一切師 甚難得再見
 我食草飲水 可自足今日 我作人已來
 飲乳甚大久 及在六畜中 亦爾不可數
 世間愚癡者 亦甚大眾多 不知作布施
 後因悔無益 我乃前世時 慳貪坐抵突

復隨惡知友 不信佛經戒 使我作牛馬
至于十六劫 今乃值有佛 如病得醫藥
持我所飲乳 盡與滿鉢去 令我後智慧
得道願如佛

時天帝釋即爲阿難取牛乳種得滿鉢去阿
難得乳意甚歡喜於是梵志從聚邑中來出
觀者悉聞此牛子母所說皆共驚怪展轉相
謂言此牛羸常時弊惡人不得近今日何故
柔善乃爾想是阿難所感發耳瞿曇弟子尚
能如此何況佛功德威神變化然而我等不
信其教即時歡喜信解佛法梵志摩耶利門
室大小聚邑男女合萬餘人皆悉踊躍遠塵
難垢逮得法眼阿難持種還至佛所是時世
尊適爲無數千人說法阿難即前更整衣服
長跪叉手而白佛言向者奉使詣梵志摩耶

利家索種牛之子母便作人語我聞其言大
驚怪之佛告阿難是牛子母悉說何等而汝
意疑阿難白佛此摩耶利有一牛大弊惡喜
舐躡人家中人使初不敢近主雖不得聲取
種者但今產乳是牛自產犢大且好勝於餘
犢百千倍也梵志密勅兒使制不得令爲我
取種我自念言沙門法不應手自取言適竟
第二忉利天帝釋即來下化作年少梵志被
服因住牛邊我言倩卿聲取牛種帝釋言諾
便前取種即告牛言今世尊小中風當用種
汝與如來種者得福無量於是牛語答帝釋
言取我兩乳置兩乳種以遺我子犢在母邊
聞世尊名心大歡喜便語母言持我乳分盡
用上佛如來世尊天人所師甚難得值我作
人時飲乳大久作畜生時亦復如是世間愚

癡者甚大多不知布施後世當得其福我乃前世坐隨惡友不信經道喜行抵突是故使我墮牛馬中十六劫乃得聞佛聲悉持餘乳用上如來願後智慧得道如佛牛母犢子說事如是佛告阿難實如牛子母所說佛言諦聽我之所言此牛子母乃昔宿命時曾爲長者大富樂饒財寶復慳貪不肯布施不信佛經戒不知生死本常喜出錢財在外人來從舉息錢日月適至喜多債息無有道理既償錢畢復謾抵人言其未畢但坐是故墮畜生中十六劫今聞我名歡喜者何畜生之罪亦當畢是故聞佛聲便有慈心以種與佛用此因緣當得解脫佛爾時笑五色光從口出天地爲大震動光照十方還繞身三而分爲兩分一分入齋中一分從頂入便不復現於是

第十

阿難即前長跪叉手白佛言佛不妄笑會當有緣佛告阿難汝所問者大善何以故此牛子母却後命盡七返生兜率天及梵天上七返生世間當爲豪富家作子終不生三惡道所在常當通識宿命當供養諸佛爲懸繒幡散華燒香受持經法牛母從是因緣最後當值見彌勒佛作沙門精進不久當得羅漢道犢子亦當如是上下二十劫竟當得作佛號曰乳光國土當名幢幡光明乳光如來得作佛時當度天上天下萬民及蜎飛蠕動之類其數當如恒沙數爾時國中人民皆壽七千歲被服飲食譬如北方尊上天下佛在世間教授四萬歲般泥洹後經法住止萬歲乃盡佛告阿難牛之子母以好心善意布施與如來乳種俱得度脫如畜生尚有善心何況作

人六情完具能別知好醜而不信明生所從來死所趣向復不知佛經戒不信布施後世當得其福人但坐慳貪故還自欺身心念惡口言惡身行惡愚癡之人皆由是故不得解脫佛說經已會中五百長者子悉發無上正真道意三千八百附十梵志本不信佛法聞經踊躍歡喜應時得須陀洹道五百人本不信生死罪福見佛變化悉受五戒爲清信士佛說經已比丘衆長者梵志人民皆大歡喜稽首佛足而退

佛說乳光佛經